

Per ils 125 onns Universitad da Friburg

Il bus ambulat cun la roadshow è sa fermà a Cuira


■ (anr/gc) 1889 è l'Universitad da Friburg vegnida fundada. Ella po pia festivar uonn ses 125. anniversari. Quai fa ella cun in'entira retscha d'occurrentas commemorativas sur l'entir onn: a Friburg, tant en la citad sco en il chantun, mo er en Svizra. Uschia è la roadshow durant 60 dis sin turnea e fa staziun en diversas citads da l'entira Svizra quadrilingua. Dals 1-4 d'october, pia quels dis, è il bus – che dat invista en la vasta purschida da l'universitad – sa fermà a Cuira sin il Kornplatz. L'avertura ha gi lieu la mesemna saira. Ina insufficienta organizaziun ha deplorablmain gi sco consequenza ch'i n'aveva strusch gliud tar l'avertura, stada tant cordiala sco infurmativa.

Lungs contacts tranter l'universitad ed il Grischun

En il center da tuttas allocuziuns tar l'avertura è stada la detg stretga relaziun tranter l'Universitad da Friburg ed il Grischun – e quai dapi l'entschatta.

Il vicerecur, *Titus Jenny*, alleghescha numerusas persunalitads dal Grischun ch'èn stadas a l'universitad u s'engaschadas per quella dapi sia entschatta. En spezial fa el menziun dal nov institut per plurilinguissem a Friburg sco era da la stretga collavuraziun tranter l'Universitad da Friburg e la Scol'auta da pedagogia a Cuira. Era lauda el che tants Grischuns han fatg lur studi a Friburg ed avess gugent sche quai giess era vinvant.

Il schef dal Departament d'educaziun e cultura dal Grischun, cuss. gov. *Martin Jäger*, porta ils salids dal chantun a l'uni-



Giusep Nay ha discurrì sco anteriur absolvent a l'Universitad da Friburg.

FOTO G. CAPAUL

versitad giubilara e constatescha che per il pli hajan Grischuns catolics absolvì là lur studis academics. Blers dad els sajan returnads suenter il studi en il Grischun. El è zunt engraziavel a l'universitad ed al chantun da Friburg ch'i dettia ina uschè stretga collavuraziun per il ru-

mantsch a la Scola auda da pedagogia a Cuira. I saja stà e daventà in prender e dar vicendaivel.

Il parsura da la citad da Cuira, *Urs Marti*, porta ils auguris a l'Universitad giubilara da Friburg ed engrazia che sia expositiun ambulanta è sa fermada er en

la chapitala grischuna. La citad da Cuira saja surtut stada colliada cun l'Universitad da Friburg tras Oscar Vasella (1904–1966), naschì ed era sepulì a Cuira, che haja docì a l'universitad na main che 70 semesters ed era perscrutà l'istorgia da Cuira e dal Grischun. Era la pro-

fessura da rumantsch a Friburg saja da gronda muntada e l'engaschi da questa scol'auta per il plurilinguissem insumma.

L'avertura da l'expositiun ha gi lieu en la tenda sin il Kornplatz. Quella era decorada internamein cun purtrets da renumads alumns da l'Universitad da Friburg. Tranter quels sa chatta era l'antieriur president dal tribunal federal, *Giusep Nay*. El ha discurrì a Cuira a l'entschatta per rumantsch e punctuà spezialmain ils gronds merits da Caspar Decurtins per la fundaziun da l'Universitad da Friburg. La relaziun tranter l'universitad e la Surselva catolica saja adina stada stretga. El lascha era reviver reminiscenzas da ses temp a Friburg e deplorascha fitg ch'adina pli paucs Rumantschs absolvan là lur studi.

Punts linguisticas tranter Friburg ed il Grischun

Il nov professor da rumantsch a l'Universitad da Friburg, *Mathias Grünert*, preschenta en in stupent exposé co l'Universitad da Friburg sa profilieschia oz en la domena da la plurilinguitad. En quel connex haja il rumantsch ina posiziun tut speziala. Ils lioms tranter ils dus chantuns plurilings, Grischun e Friburg, cumpeglian tuttas quatter linguas naziunales. Quai giaja enavos sin l'entschatta da l'universitad e sa sviluppeschia oz sut novas premissas instituziunales. Il referent preschenta las perspectivs che sa resultan ordlonder per l'avegnir. Facit: Il rom rumantsch è vegnì integrà uss a l'Universitad da Friburg en il svilup instituziunal sin il champ dal plurilinguissem.